

四庫全書

集部

欽定四庫全書

集部

江湖小集卷六十五至

詳校官中書臣張姚成

助教臣常循覆勘

覆校官主事臣龔敬身

校對官助教臣胡予襄

謄錄貢生臣孔繼峯

欽定四庫全書

江湖小集卷六十五

宋 陳起 編

吳汝式雲臥詩集

遺興

弱齡性淡泊鄭圃吾其師及茲拙生事窮窘常經時無
方可紆急何以宣中懷柴門蔽殘席咏書倦徘徊呼兒
促觴至日翫天雲飛山鳥送新響日遲花露滋頽然醉
欄下不省何如時雖非富貴樂富貴乃所乖疎松碎明

月密竹節清風親交昔與別若謂行相從延企邈不及
音容隨想生諒彼亦耿耿飛爽留空形援琴不能寐意
乃多於聲晤言豈無偶眷眷詎可忘編蓬諧夙心尊古
豈文義所得靡有言應酬聊爾耳室中無萊婦童弱偶
成四圍鬯寧無思達此天亦蛻客來問長鬚新醅可筍
未行行陟高岡一顧俯烟水客去不肯留吾歸且休矣

歲終呈一齋

磊砢千丈松清陰蔭林丘豈無棟梁用匠伯不見收匠

伯恐未良棟梁終有求天風叶偃蓋五雲常為浮學道
非學世韜精養中和紆朱各自貴誰肯聆商歌皦皦大
聖心昭然空自多著書後子雲千載應不磨

酬玉汝

礫攘畢春氣長羸換新綠爽風吹涼光
紉餌釣山淥儵魚噀水香菰蒲削藍玉
老景結清和心花委濛濛日暮雲倒飛
苦雨濕茅屋竒哉五碎金青草眠黃犢
天行貴葆真心骨迥凡俗一尺黃菊花
秋風播芳馥

遊石仙分韻得觀字

閑攏兩袖秋步入冲寂觀古樹老雲中仙居毀巖半是
時零雨高葉脫淒風亂恠禽走何忙澁水流不漫那知
張郎仙譎幻敢懸斷雷書貯洪崖愚下浪傳贊符碑儻
長靈鬼物豈歌喚尚云劍埋山安得急推斷冷翁亦張
徒精氣不知散死坐豫樟空鑿竅競窺看何不葬山原
不然棄江汧烏鳶與螻蟻豈食吾一貫獨流天地間萬
古亘光燦神仙固渺茫此事良可惋忍哉偷兒狂更擣

泥腹爛我來擬少休亭壓不敢玩黃冠
四人拙野只欲竄延坐無好言令我住涼館
飯餘且縱觀逸興薄霄漢琴鳴著高彈
奕勝出奇筭歎咏壺隱樓撫事發長嘆
大書同人名聊欲記遊翫陰霾淦輕寒
日色倏昏晏倩人買村醪煮芋疊肴按
清坐二更深一睡各鼻鼾曉來登巖頭
棘路解羈絆劃開天蓋寬遠景過飛翰
幽藂摘新查窺險身發汗居然束歸裝
重下西巖畔我思古之人豈只局窮閉
觀海登泰山深高世間冠斯巖雖荒榛

樂事實昭煥人心本然同今古未容判終當駕雲風高
蹈無畔岸作詩示兒童茲遊吾豈但

謁來

領上謁來觀白雲翔鸞奮鶴浮天英斜開錦繡春樹滿
溶溶半露遙山青忽然變現成蒼狗萬里長風霍無有
海龍塞氣不敢吹日照虛空無老時

領上謁來弄明月千里銀光寒不缺蝦蟇颯颯走死盡
直數秋毫上金闕心如月月如心嗒然獨據無絃琴

騰騰轉空白日晝詩帶流星過南斗

江湖小集卷六十五

欽定四庫全書

江湖小集卷六十六

宋 陳起 編

趙崇鉶鷗渚微吟

調漁者

山明松雪水明沙一曲清溪著釣槎我已浮湛君漫浪
漫煎我水試君茶

頗愛

頗愛樂天齊物我夢隨吟賞洛中橋桃花細馬載楊柳

半面春潮紅未消

食化

海食多詭心
菘食令人魯
山中食齋人
幽吟肺腸苦

青陽

青陽滿芳蕤
流連度丘園
眄睐不忍折
恐傷造物恩

夜坐

自炷芳蕭讀道書
玄文豁落走龍魚
松梢露色掛北斗

一夜風前學步虛

尋真夕對

春雲弄月黃金絲
春山草木皆仙姿
松根對坐日西夕
群峯當前列青壁
鏗鏗虛壑含古音
靜聽宛是商山吟
洞石微開月當戶
剪水絃冰心手語

有贈

別意參差透碧欄
外頭斜月逼人寒
鈎簾恐礙雙棲鵲
乍可桃花隔霧看

簡雲臥

憶君心事如流水
流向江頭作暮潮
想得潮平沙有雪
自鏗鐵版和吹簫

空城雀

空城雀黃口鳴啾啾
空城無人種禾黍
飲啄飛鳴由得汝

山間

山回霧氣濕生意
鞠磻隱石道苔蘚
春松花鬱金粉

東風

東風吹梅梢飄搖泛香雪下有野草根蘄然競時節

野園

野園對客無杯勺共坐茅欄理釣車片月漸低風露冷
隔簾山鬼嘯梨花

至後

悄悄雲氣繞江城至後寒輕詎可憑兩日南風將雪信
牀前蝙蝠夜翻燈

大孤

大孤溶溶決眼青小孤江色春冥冥隔江淮壩幾千里
枯荻蕭穆朔風起佳人何在遙相望我無羽翼從君翔
為君暗整真珠裳綠蘅翠芷參差香

壯節亭二松

壯節亭前野碧滋髯龍飛去忽經時祇應黃犢蒼藤路
尚有清泉白石知

東風吹桃花

東風吹桃花花光射春林相看各媚斌艷冶搖人心憩

蝶下新綠游魚上清潄百年一須臾冥觀契飛沉

曉起

雨漂窻紙濕成瑕風壓甃瓶臥枕沙曉起無悰錫粥冷
自添新水救梨花

江上

清露初生紅蓼秋爽風先到木蘭舟釣絲不捲波痕穩
夢入蘆花數白鷗

仙思

水殿風清急景斜
靈君初下五雲車
碧羅寶扇雙題字
記是誰人詠落花

麻姑擗麟不肯食
飛猿嶺上餐松實
月冷天空涵曙光
露色凝烟白如蜜

東溪夜泊

雪滿汀州風滿林
霽光空徹夜深深
推篷却受梅花月
自嘖橫簫調楚吟

甕天

康廬戶廳東偏本吳西山遺址

不見甕天人但見石上字誰能負甕去奪我寥天思甕
破奚有餘甕在奚不足吟作甕天辭摩挲石苔綠

雜興

潮平烟斂月明高霽宇涵空見羽毛我自無能君了了
檣杆獨倚調離騷

日日西風坐石苔手捫蒼壁倚雲開却來平地觀空色
不信碧西天際來

都昌書事

金瓶梅詞話卷之六十六
卷六十六
世事可無酒春藤還有花山雲欲到地街鼓又催衙風
緊魚休市官貧飯帶沙天機不得問暮色欲棲鴉

丫頭巖

烟雨斑斕石蘚春墜雲誰夢寶花顰行人總被虛名誤
到得傾城又誤人

月巖

王丹仙蛻馭飛翰便作琉璃世界看大地山河渾忘却
漫依桂樹舞青鸞

壁間韻

雨又入簾風又斜東風吹客客思家浣紗西去誰家子
青絹圍裙插杏花

山月溪風兩自由紫蘭綠桂等離憂狂歌鬱鬱成何事
一片夕陽蘆荻秋

海棠開盡故清寒漠漠梨花暮色閑酒滿綠樽愁滿酒
醉凭枕障認巫山

半髻嬋娟垂兩鴉驚潮微隱寶簪斜客愁正自遊絲亂

莫戴釵頭百結花

往體

積雪久不解下有希世珍志士緼袍間苦心終不伸安
得白日光能照清夜顰

皓彩青雲端飛光落溟渤渾河與清沚同受明月魄勿
以清濁殊天光本無隔

志士惜流光遊子念長道流光如奔霆長路漫浩浩飢
人忽夢飽百憂悉傾倒真妄安足論榮名以為寶

松下

松梢涼露警孤鶴潭面北風蟠老蛟蛟老涎腥波浪惡
獨吟碎月看松梢

癸卯除夕客中

膝下傳觴事已非辦香千里隔庭闈推心遠憶新阡上
寂寂低松雪乍晞

數日

數日東風欺病骨侵凌曉色作輕寒客來坐久無談柄

共看遊絲上井欄

梅

新陽斡神軸
枯朽皆光榮
稜層冰雪中
復見天地精
姑射神所為
伯夷聖之清
太白抱軾軻
靈均擁芳馨
是子心寬閒
不受纖芥縈
獨立萬化先
皎皎非近名
溪流鑑寒柯
游風吹落英
山明霧氣濕
月落參旗橫
群虛妙香發
一洗萬慮輕
紛紛鬼女姿
慙愧東風情

狹斜

吳姬凌寒吹玉笛手彊誤作遲遲聲却來拋眼調行客
中有二月東風情東風二月楊花滿伯勞朝啼芳思亂
狹斜綉轂易為愁邂逅相逢莫腸斷

破褐

生松鬱寒灰破褐出殘絮童兒不耐煩微吟起身去

湖中

汀蒲獵獵起涼颼碧藕香中獨立時機事兩忘吾喪我
扁舟吟過水仙祠

新隄

淡烟衰草雨絲絲
小醉微吟倒接籬
吟到水西雲影北
莞然一笑已無詩

書事

東鄰老翁寒不寐
百結懸鶉杖悲涕
自云子孫學灌田
不識江湖與風水
大兒里胥縛送州
小兒逃遁卒未休
老夫忍飢特未死
犁耙典盡春無牛
身為王民合徭役
運米操舟操不得
江湖風水未足愁
檝喪檣傾誤人國

答碧山

欲種梅花無古根，手移蘭茁上甕盆。
却憂逼仄傷蘭性，自下清招為返魂。

答維溪

維溪插架三千軸，葦苴紉蘭得自娛。
會須握手論活法，靜看碧水生玄珠。

學詩

神仙不可學，願學長不死。
學詩如學仙，吞霞潔塵滓。
渚

花流水香烟霏暮山紫涼颺入修竹一笑鳴綠綺

雀

短翅遍瀾貝花紫逐食飛行曉霜裏祇知背爪永自肥
肥甘累人心弗知天寒日暮向何處前路多山慎勿去
吳兒織網連素空一落牢籠腥血紅

南內

已剪諸郎百慮輕驕兒長大又生獍祇愁南內無歸日
南內歸來萬古情

江湖小集卷六十六

欽定四庫全書

江湖小集卷六十七

宋 陳起 編

葛天民小集

春懷

向晚一鳩鳴道人春睡足無處寫幽懷
巡簷數脩竹

絕句

夜雨漲波高二尺失却搗衣平正石
天明水落石依然
老夫一夜空相憶

看山

我本田夫作比丘也知騎馬勝騎牛如今馬上看山色
不似騎牛得自由

寄楊誠齋

參禪學詩無兩法死蛇解弄活潑潑氣正心空眼自高
吹毛不動全生殺生機熟語却不排近代獨有楊誠齋
才名萬古付公論風月四時輸好懷知公別具頂門竅
參得徹兮吟得到趙州禪在口皮邊淵明詩寫胸中妙

用則致君堯舜前舍時便灌廬陵園六十四卦只兩畫
三百五篇惟一言我與誠齋略相識亦不知他好官職
但知拚得忍飢七十年脊梁如鐵心如石不曾屈膝不
皺眉不把文章做出詩玉川後身却不恠樂天再世尤
能竒隔千里兮共明月何似寒灰相對撥公亦何須要
我知我只欠公頭上髮

醉書酒肆

碧床酒盎香拍浮吳姬粉醉不識愁黃金手揮博歌頭

金史四庫全書
卷六十七
夜半春回楊柳樓

竺澗梅

龍脊橋邊鶴膝幽一枝斜亞水橫流自從識破胡笳曲
吹徹黃昏不解愁

謝文思徐敬伯見訪

半山徐敬伯薄官在中都柳舍偷閑到村醪就近酤易
添詩債負難得醉工夫却羨漁樵叟雖貧一事無

即事

春漲侵高岸春雲裏亂山倒遷楊柳活斜倚桔槔閑世
味老方淡花時晴最慳東風嗔嬾動故故撼柴關

重訪白石

長安唯白石與我最相關每到難逢面翻思懶下山欲
歸愁路遠小住待君還盡日看幽桂無人似我閑

達磨渡蘆像

一言已出駟難追賴得君王放過伊揚子江心杭折葦
浪頭何似問頭危

收白扁豆因得二首

齒髮中年態丘園素隱心因栽白扁豆欲當紫團參
篁筍收繁莢牕扉失茂陰蕭蕭簷外竹抱蔓替予吟

古香無伴侶一榻共雲分澗水塘頭過樵歌枕上聞
余生聊自適此意與誰論落葉如相委時敲月下門

仲春初二絕

落梅如雪雨如麻最怕春寒是杏花病後不能消滴飲
可憐芳信到貧家

初交二月草蒙茸鄰里紛紛去折蓬柳下閉門非嬾出
苦無筋力趣兒童

湖上夜歸

陌上紅塵歇湖中翠靄生定鍾山寺迥新月夜船清蛙
亂鳴方急鷗閑睡不驚兒曹知我到認得打門聲

聞鳩

勢動猶寒在鳩鳴恰睡餘素傳鷹羽化多占鵲巢居報
我晴何用憐渠拙自如年年偏感處風急杏花初

迎鶯

咫尺春三月尋常百姓家為迎新鶯入不下舊簾遮翅
濕沾微雨泥香帶落花巢成雛長大相伴過年華

玩蝶

粉翅來何許春風卒未休衆芳皆舊識微雨是新愁鬪
舞圍牆角貪香綴藥頭與花俱不語相可自風流

聞杜鵑

望帝知何苦催歸不自禁竄身依樹密啼血染花深細

雨離人淚遊絲蕩子心青山明月夜老耳最知音

湖上觀柳偶記龍泉先生勾春柳一絲之句感

而有述

斷槎無葉又無枝得似勾春柳一絲不是畫船棲泊處
白鷗飛下立多時

嘗青梅

疎影橫斜處忽忽入夏看綠陰遮得暗青子結來酸因
病全疎酒如癡猶凭欄楊花無藉在風急正漫漫

開井

小圃新穿土中藏一丈空山腰泉脉透井口樹陰蒙澆
藥先資用煎茶已見功甘涼羞自薦汲許四鄰同

龍井

龍護深潭草木昏斷碑元祐典刑存蜀仙已去吳僧少
嶺上松篁亦斷魂

江山

連天芳草雨漫漫贏得鷗邊野水寬花欲盡時風撲起

柳綿無力護春寒

望越懷親

高帝陵邊我故廬
白雲慘淡帶蒼梧
歸心政與江流動
更著青山隔岸呼

寄輔漢卿

憶殺平生輔漢卿
武夷山裏話寒更
不知新歲還家未
白髮衝冠有幾莖

訪端叔提幹

月趁潮頭上山隨柁尾行大江中夜滿雙櫓半空鳴雁
冷來無幾鷗清睡不成平生師友地此夕最關情

山中題古墓

冢荒無樹亦無碑土面磚痕似灼龜壞道尚存翁仲守
傳家知是子孫誰文成東海終難料欲錮南山最可悲
要寄此情浮世去臨流說與落花知

題謝耕道一犂春雨圖

耿耿思田舍攸攸倚釣竿一犂歌短闕十口飯長安老

覺驅馳倦生知稼穡難畫圖詩卷在留與後人看

即事

暮年居柳下終日閉柴門壁為題詩暗池因洗硯
渾閑知真富貴醉到古乾坤回首長安道無言只斷魂

偶成

始參龍象種終現馬牛身再整衝冠髻難忘漉酒巾
散花天上女撥草道中人寄語林和靖非翁不卜鄰

竹

此君別後稍添丁留得清風鎮戶庭老鬢不禁霜點綴
舊鄰多似樹凋零一竿帶雪寒垂釣數畝連苔晝掩扃
此話有誰堪委似幾回無語向青青

蓬居詠枇杷

早誦相如賦知渠舊姓盧花香冰裏見風味藥中須細
雨同梅熟清聲混樂呼山禽嗔老子拍竹護金珠

元夕

天街夜鼓徹雲霄一望星河影動搖佳節無如元夕盛

老懷不似少年豪紅塵巷陌青絲鞵明月樓臺紫玉簫
誰料南坡招野叟詩肩相對兩峯高

簡道安

相將除夜南風起雁已聲聲向北飛驟暖定知為雪骨
瘦年終不似冬肥日來病可方開酒節下春回稍減衣
正好伴公湖上去孤山觀裏看梅歸

澗泉招飲次日乃生朝

平生南澗古遺民初度招呼我輩人每聽謔談須絕倒

極知老氣政輪困
盃盤滿坐添燈火
兒女成行勸主賓
但願吾儕似梅柳
年年相見一回新

平居遣興

隔籬人語自宣嘲
緊閉苔扉不許敲
談麈帶塵懸屋角
牽牛承露上林梢
投閑得計心常足
擬古成編手自抄
風雨欲來偏感處
蟻先移穴鵲移巢

桃花

洞裏桃花自古初
人間塵事幾乘除
重來漁父難相覓

前度劉郎未忍疎
畫幟迎逢春女渡
采符供奉歲朝書
嫣然似共幽篁語
占盡風光奈得渠

偶題

綠樹何稠疊
清風稍羨餘
枕縈雲片片
簾透雨疎疎
脩寬通泉壑
殘碑出野鉏
丘陵知幾變
耕稼雜陶漁

西湖泛舟入靈隱山

晴嵐漠漠水溶溶
落葉遮船翠蓋重
秋色盡為漁者占
山光多向道人濃
雪連合抱前村樹
礧繞飛來小朶峰

送罷夕陽迎素月樓臺高下自鳴鐘

梅花

寄遠含芳別隴頭胡沙漠漠去無休誰招青塚千年魄
散作黃昏萬斛愁畫角霜清腸屢斷花光墨淡影空留
年年最憶前村夜一段孤明雪亦羞

幽居

遠懷日與靜相宜山色窺簾潤撼扉野草自花聊獻笑
重雲不雨謾垂衣人間事業難爭長睡裏工夫獨造微

却恠蒙莊猶寐語夢為胡蝶未忘機

秋日湖西閑泛

雨洗千峯曉波涵萬頃秋菱花開古鏡蓮葉度輕舟思
遠人誰識身閑世不收望中時得句倚櫂雜吳謳

郊園避暑

有暑猶當避無憂可得忘竹疎身共瘦湖近意先涼靜
勝寧須爽幽酣不待觴還同殘夢樂炙背負朝陽

小峰行樂却望北山

霜高群木落湖上數峰秋野笛歸牛徑烟蓑宿鷺洲望
中多隱約佳處小遲留百歲無虛日能堪幾度游

蝶

黛拂雙眉粉襯毫翅烘晴日伴相遭戲勾稚子從花遠
恐惹遊絲莫鬪高栩栩倏來仍易散深深交舞為誰勞
吳王花草滕王筆千載風流敵楚騷

杏花

陌上春泥苦未乾絳唇漸吐不禁寒海棠尚晚教誰伴

山帽衝風每自看，聲好最憐清曉賣味甘。
長記綠陰團，年年過雨，胭脂落時，序關心有幾般。

林間石

摩挲只作釣磯看，相伴秦翁且住山。
霜洗舊稜人共瘦，蘚侵孤韻鶴同閑。
因思樵牧分爭處，已過唐虞揖遜間。
風月滿林時，憩寂三生幽事夢中還。

小隱自題

水拍荒籬外，山攢落照邊。
鴉鴉乘犢去，鴨鴨伴鷗眠。
思

淡秋雲薄情高隴月圓武陵知避世初不為求仙

夏日池上

微波漾漾雨濛濛岸脚烟莎間水蒸照影已無雙鬢綠
關心猶有一絲風鴛鴦對浴紅衣撲菡萏相親翠蓋籠
醉舞夢吟皆勝處箇中非異亦非同

孤山後寫望

凭高每嘆昔人非空有群峯礙落暉大雅風流誰舉似
長安秋草又衰微寒花負約開猶嬾幽鳥忘機趣不飛

來往半生堪記處
西村燈火夜船歸

小舟

萬頃波中獨釣身
短倉低屋舊絲綸
自憐清夜歌明月
誰共滄洲采白蘋

梅花

桃李麓疎合負荆
歲寒標格許誰并
花中有道須稱最
天下無香可鬪清
倚竹向人如少訴
臨流窺影更多情
何當喚取湘纍起
伴我空山茹落英

孤山後舟中寫望

水接遙空分外寬
孤山月出靜中看
疑從弱水移圓嶠
似共姮娥住廣寒
秋雨秋風初過後
荷花荷葉半凋殘
西村數點歸鴉濕
老子新題墨未乾

詠畫上人石湖春望

蕩蕩春風草木香
茫茫澤國水雲長
鶯來占柳為歌院
蝶去尋花作醉鄉
閑與物情聊品帶
老於文字嬾巡行
望中別有關情處
幾度朝陽又夕陽

湖村晚興

殘霞伴孤鷺遠岫雜斜暉
秋向詩中出人從畫裏歸
柳塘雙槳急茅舍一燈微
小艇穿籬入蒲蓬正擁扉

雪後

雪中多日靜湖上少人遊
禿樹花為市斷槎鷗當舟
一杯殘臘酒萬古夕陽愁
富貴非吾願葛天雲正浮
冷蘂通幽信孤山欠幾遭
孟因寒更滿句到淡方高
雪滴晴簷雨松翻夜壑
濤布衾雖似鏡猶念早趨朝

臘雪

片片嘉平瑞無聲有耿光來雖成頃刻釀亦費商量天
闕花無賴風休絮不狂孤山林處士魂在隴頭香

和子舒冷泉夜坐

亭空山盡入人靜夜初分喬木陰遮月清泉影浸雲不
題波上葉只採礪中芹澗水令人憶何當入郡聞

宿裴庵

一徑松杉迥成陰見日稀山晴僧盡出風暖鶯交飛結

子花拋樹欄人犬護扉閑看山月上清坐更添衣

答趙紫芝

九日離東嘉長安了歲華未登揚子渡先訪葛翁家天
作今朝雪燈開昨夜花一杯能強飲不必問丹砂

簡趙紫芝

紫芝雖漫仕五字已專城清坐有仙骨苦吟無宦情囊
因詩句重分與酒盃輕所好煎茶外燒香過一生

清明前四日泛湖

繞岸堆青嶂游船滿綠波樓臺臨水近楊柳占春多老
去誰同調尊前且放歌韶華能幾日隨棹已新荷

送薛子舒船官

憶君江上去船重載書多學乃從吾好閑應喜客過薰
風新綠樹明月舊滄波自古關情處相思入詠歌

訪紫芝回與子舒集

君參唐句法親得浪仙衣薄宦因吟苦高風與世違春
寒留夜飲月黑借燈歸共隱知何日空山老薜薇

即事用天竺韻

寒食少逢天氣佳十朝九日雨如麻
新巢唯有鷺生子小巷已無人賣花

夏日

曉荷承墜露晚岫障斜陽樹下地常陰
水邊風最涼蟬移鷺鵲近鷺起得魚忙
獨坐觀群動閑消夏日長

雜詩

下竺山前打一遭丁寧門子看溪橋
恐鷺繞梅花落

莫遣行人語笑高

雨中

梅雨朝仍暮蓮塘夏似秋水高侵樹脚屋漏滴人頭歇
畫厨烟出占晴礎汗收群山思會面扶病一登樓

元夕

元宵有月便無愁已是新年第一籌說與素娥從此去
只須依樣做中秋

送薛子舒

南渡今何似中流欲濟船雖憑人擊楫要若水行川竹
木如山積桑田與海連吳宮猶可問白鳥暮推烟
海邑青龍鎮船官野鶴身誰知貴公子却是苦吟人二
陸多遺迹三高屬近鄰新篇因弔古時寄葛天民

次紫芝韻

欽羨私居好樓深夏必涼小窻通遠岫古木蔽斜陽露
檻安花斛塵編滿竹床如君清到骨只合靜焚香

小亭

小亭終日對幽叢兀坐無言似定中
蒼蘚靜連湘竹紫
綠陰深映蜀葵紅
猫來戲捉穿花蝶
雀下偷銜卷葉虫
斜照尚多高柳少
明年更欲種梧桐

上巳呈嚴叟

時俗常談已斷霜
雨寒翻著絮衣裳
花枝照眼堂堂去
茗椀關心故故香
楊柳稍傳鶯割據
茅茨敢望鶯商量
舊遊莫誦蘭亭語
自覺中年易感傷

荷葉浦中

急雨捎荷分外奇，珠璣狼籍錦紛披。
下塘六月關心處，西塞扁舟入手時。
却傍青蘆深處宿，還思白石去年詩。
平生浩蕩烟波趣，月淡風微只自知。

贈眇目道人說相

道人只具一隻眼，靚面全提格外機。
塵裏神仙誰做得，歸來試舉問麻衣。

戊辰夏五過抱朴巖

北窻隱隱透南薰，老子全身是此君。
冷入魚腮池面雨，

靜連禽語樹頭雲苔因覓句行來破石為觀空坐得溫
時事自多無耳聽長安雖近不曾聞

元夕西陵橋觀月

年頭半月雪漫漫養就姮娥玉一團老小今宵竒絕處
西陵橋上獨凭欄

雨中郊外

暖氣先回宿草根青青行可藉芳尊未須著意催花柳
且為乾坤補燒痕

正月二日

小巷春陰獨掩扉
峭寒著盡過冬衣
老來情緒無多子
禁得梅花似雪飛

正月二十七雨中過蘇堤

一堤楊柳占春風
柳外群山細雨中
人苦未晴渾不到
只宜老眼看空濛

清明日訪白石不值

花薺懸燈柳插簷
老懷那得似錫甜
畫船已載先生去

鷺子無人自入簾

送劉僧善行

西望群山碧入吳故人一笠片雲俱東風不斷村村柳
展盡陽關送客圖

湖堤晚步

照影憐寒水關情奈夕陽雪慳天欠冷年近日添長好
句誰相寄浮生各自忙有身聊頓放亡事可思量

懷天竺礪梅

根在巖邊結枝從水際橫此花殊近道凡木欠修行密
雪籠幽片疎篁倚瘦莖那時香不淺憶我話無生

柳下即事

老柳中間野岸濱水清常照樹邊身白鷗黃鳥相忘久
來往如今不避人

睡少

睡少秋難曉吟多食愈貧南柯無近闕差盡夢中人

湖上新秋

十里荷風蓋盡傾城中憶殺水邊清
催詩未用西湖雨且送新涼入帝城

六月一日同姜白石泛湖

六月西湖帶雨山小舟終日傍鷗閑
風烟如許關情甚賓主相推下語難
幾點送君歸大雅一涼今夜滿長安
江湖遠思知多少歸去風前各倚欄

正月十二日夜姚江

斷岸春風峭江空夜雨清
蕭疎蓬上點彷彿葉間聲
今

古雙眸冷乾坤一棹輕鬢從湖海白誰識謝郎情

雨中獨酌

平生寡合雖竭斗幾曾自飲一杯酒不因風月與湖山
更為松篁與花柳今夕何夕風雨來知儂渴肺生秋埃
麴生三緘忽自薦請為風雨聊一開老夫呼前呼未了
死生脫帽傾懷抱風雨橫斜入坐中賓主淋漓俱醉倒
須臾風止雨亦休主人送客凝雙眸葛天無懷不可狀
但覺兩耳風颼颼匆匆便是中秋節更與麴生潛地說

此夜寧容著雜賓一尊只辨澆明月

水仙

玉潤金寒窈窕身翩翩翠袖挽青春水晶宮裏成仙女
香醉山中得道人朔雪幾回埋不死南洲一出淨無塵
朴翁老矣誰同調相對無言意轉親

江湖小集卷六十七

欽定四庫全書

江湖小集卷六十八

宋 陳起 編

張弋秋江烟草

張君彥發湖海豪士不喜為舉子學專意于詩每以賈島姚合為法所著僅成帙清深間雅宛有唐人風致至其得意警絕之句雜之兩人集內殆未易辨彥發思甚苦未嘗苟下一字每有所作必鎔鍊數日乃定揆其用力蓋倍於江西之學人必從事於此而後

知其難且工彥發舊名奕字韓伯世為孟之河陽人
嘉定戊寅仲冬八日古晉丁焞晦夫書

寄趙紫芝

獨游非一事書札故應遲江上逢春日湖邊憶醉時有
雲為我伴終日誦君詩百鳥鳴花樹聲聲在遠思

得山中友人書

近得山中信山中頗寂寥酒方收秫釀薪旋割茅燒破
屋秋多雨平湖暗有潮不曾逢客至默坐過清宵

春晚

萬事吾今飛絮輕
此身如燕又巢成
暗思庾信家邊竹
綠籜新添有幾莖

夏日從陳宗之借書偶成

自從春去後
少省出柴扉
樹暗鴉巢隱
簷空燕迹稀
憶山憐有夢
當暑詠無衣
案上書堆滿
多應借得歸

楚州

落帆停鼓鶴湖頭
兩度因循到楚州
柳下人家嘗識面

咲求新句寫粧樓

江樓飲客

鄰家貰酒尊斟酌共王孫
老菜羹遲熟凍油燈屢昏
夜寒人罷市坐久僕敲門
隔岫歌明月月明江水渾

游蔣山

練布作方袍因閑偶出遨
秋風城郭淨寒色樹林高
鹿守禪關老僧脩佛殿
勞再來思久住人世事如毛

送蔡監丞赴高郵

城古似盤盂榮分刺史符夏新看藕葉夜久見蠙珠吏
過朱方接山從邵伯無文游遺迹在民俗易相孚

送杜晦之兄弟歸閩

秋來猶苦熱歸去莫貪程官寫新銜位詩傳舊姓名幾
家村酒賤一路澗泉清想到鄉閭日爭看兩弟兄

簡周宗聖

曠野有芳芷近江無早鶯春詩定多少旬日又清明樹
暗憐楊柳花開認橘橙相尋每乖阻夢裏亦愁生

莫春

日日雨霏霏開門無所知漫尋花發處已過絮飛時替
紙蠶生遍脩巢燕立危但催人老去羞作送春詩

游長干留寄聰公

僧去尋芳草客來看落花就齋槃乞米借水鼎煎茶日
炙春無色風吹天有沙欲回成再住此意問林鴟

舟次湖口追憶任明府

重來又十年山水故悽然獨鴈仍為侶雙鳧已作仙濁

流分蜀派青色聚淮烟石上曾魚者猶言縣令賢

慈母磯

莫嫌舟逆上子細得看山衆草名難識孤花影自閑避
人鷹翅響經雨石文斑夜久江風冷神仙定往還

寄別顏伯奇

情深袂怕分豈不欲辭君轉柁方乘曉思山已隔雲菊
當前路見鴈在半江聞把盞秋纔好遙憐白鷺群

送宋謙父之清江因簡希亮

吟詩夕陽裏相送上瀟灘前路逢梅處同誰倚棹看歲
窮風力緊江濶雁聲寒持此呈蘇李人生識面難

高郵送紫芝

重逢又重別把盞更悽然明日帆開岸平湖水接天好
詩應自作佐狂夢與誰圓我欲來相趨揚州且住船

逢王元任

寂寞淮南道憑君獨記余始知元住此久悔不通書暮
岳留同眺寒房與借居共懷京邑燕已是二年餘

李景文移居

能詩留幕府借宅近南湖吏去少公事客來多釣徒雲
為今夜雪梅發去年株我爾同州住相過路不迂

元日

歷以寅為正風從艮位來桃符當壁寫竹戶趁鐘開宿
雨滋初茁長年老不材滿庭青柏葉惆悵獨持杯

送胡道士歸康廬

避世懷孤往為庵近五巒出無人作伴歸有鶴相看老

石苔衣淨深山瀑布寒自言猶養母應未得燒丹

豫章別紫芝

吟苦事俱廢拙深貧未除年來如旅燕秋至即移居古
道行黃葉空囊貯素書一生江海恨惟子最知余

子山寺

迢遞前朝寺經過遂一遊白雲鴉樹曉黃葉鳳臺秋僧
舉開山話人消在世愁殿廊經劫火已費十年修

送郭道士之江州

盡看山南景忽思山北遊
屐過雲亦動琴罷月空留
世上無非熱林間一似秋
雖然乍相識別去也能愁

彭蠡阻風寄城中故人

欲行行未得累日滯孤舟
月照山皆近風吹水倒流
地名人不識秋景客相愁
憶爾惟成夢遙知獨倚樓

留滯

蕭條十日餘留滯別人居
借史抄陳作黏碑學草書
烟清數村曉月落一潭虛
吾自疑秋色那堪樹木疎

送翁十赴舉

今年科詔下頗亦動山情
丹竈留雲守書裝冒熱行
卜知三命勝業賸一經
明倘赴瓊林宴能詩舊有聲

再送盛君之昇州

君與余皆懶余如君更貧
今年再同夏兩鬢獨非春
去棹孤山浪征衫西府塵
似聞仍用武為筭立功人

再送丕父

弟行兄出送有約共凭欄
草木雨初過江湖路轉難
同

懷年各長重別酒無歡明日雙鐘下蒼崖應獨看

移菊

秋風籬落遠晨起自移栽稍覺微根損須遲數日開最
清人愛重乍見蝶疑猜昔有陶元亮因茲歸去來

贈沈莊可

卷上芳名舊所知見君還恨識君遲數莖短髮沾霜白
一葉扁舟觸浪危問遍菊名因作譜畫將蘭本要求詩
向南郡邑多經過楚士能狂更有誰

寄蘇希亮

因何也識閒名字遂托交游索近詩想像獨吟應更苦
分明此意似相知空林日短歸鴉早遠水寒多鴈到遲
安得爾來同度歲傳聞畫筆最清奇

送徐和卿之上饒

江樹雜丹青江寒少得晴亦知君去路多是水為程銜
位猶書岳游從半作卿如逢二泉子因說野人名

章泉
澗泉

皆居
信

山行

偶作山行只杖藜歸逢寒日下山時與僧並立看紅樹
忽有鶴來栖樹枝

送人歸南康

我來方與廬山別爾去廬山是故鄉前日住山渾不覺
如今山遠却思量

舒州歲暮

窮冬日日愛天晴古寺門開絕送迎野鶴忽來橋上立

山僧獨向水邊行，過寒梅樹白全少。
入臘草芽青漸生，又是舒州一年了。
怕看新歷動鄉情。

廣教寺

即二橋故宅

英雄居處終奇特，幾度欲來今始能。
騎省文高存古篆，橋公樹朽長寒藤。
清流併遠三分澗，翠竹相依住數僧。
沙鳥詎知千載恨，日斜飛下立漁罾。

游禪林寺

寺置蕭梁曾識少，今朝薛磴始經過。
天低落日江湖遠。

烟冷風清竹樹多，蟲引翠禽行壞屋。
馬驚白犬吠懸蘿，一僧九十形容古。
巖下逢余忽浩歌。

漢東郡齋夕坐

廬山解夏洪山去，自到山邊葉已飄。
鴻雁影多憐塞近，交朋書少覺身遙。
屢遊騎慣將軍馬，不飲還封道士瓢。
心憶清吟更岑寂，玉京誰與話寒宵。

游智門寺

寺即隋文帝故宅

一間瓦屋荒山裏，山路縈迴夕照明。
祇有比丘頭雪白。

放收經卷入相迎

傳聞此地有龍飛佛殿殘磚刻鳳螭事去千年無問處
寂寥衰草卧苔碑

畫坐

出門無所往獨自坐胡床雨濯殘梅盡風吹百草長近
邊人喜戰偶病客傳方不奈春愁密思君對酒觴

江湖小集卷六十八

欽定四庫全書

集部

江湖小集卷

六十九至
七十一

詳校官中書臣張姚成

助教臣常循覆勘

覆校官主事臣龔敬身

校對官助教臣胡予襄

謄錄貢生臣孔繼峯

謄錄貢生臣苗序洙

欽定四庫全書

江湖小集卷六十九

宋 陳起 編

鄒登龍梅屋吟

關山月

行人十年歸不得，夜上戍樓看明月。
樓中星斗連太白，樓外關山鴈飛絕。
鴈飛絕，歸不得，鏡裏青蛾怨離別。
前年出塞無明月，何處團圓去。去年上
初連明月復蟬娟，月明照我長枕戈。
中原未復將奈何，憑誰寄書問端娥。
征衲

不來霜霰多

從軍行

年少良家子挺身事西北
金鳴鬪馬嘶蕭蕭短兵發
夜戰初連山斷甲濺腥血
番部帶箭降番酋連陣沒
勒功紀燕然椎鼓歸漢闕

結客少年場

并兒仕氣俠年少肝膽雄
錦臂金彈丸銀鞍玉花驄
腰插三尺劍手開二石弓
輕生重大義一戰朔庭空
斬取

月氏頭捷奏甘泉宮

秋夜長曲

碧簾掛雨秋容老寂寞江城暝烟草流蘇帳冷屏山低
蜜炬香銷睡常早夢驚離緒牽愁入翠被寒侵淚花濕
思美人兮天一方烏啼月落西風急

青樓曲

青樓女兒十五六翠掠雲髮妙裝束千金學舞拜部頭
新來教得涼州曲錦韉少年被花惱醉把金釵換香草

西風樓前秋鴈飛舞衣狼籍花顛倒

採蓮曲

平湖淼淼蓮風清花開映日紅妝明一雙鸕鷀忽飛去
為驚花底蘭橈鳴蘭橈蕩漾誰家女雲安髻鬟黛眉嫵
采采荷花滿袖香花深忘却來時路

江南春

玲瓏樓閣江城晚楊柳絲絲凝碧烟飛燕不歸春滿地
百花香裏聽啼鶯

長門怨

怨殺宮門不忍開
無情孤月暗蒼苔
而今痛惜珊瑚枕
曾是君王賜御來

巫山高

巫山龍從巫峽曲
一十二峯淺凝綠
老猿化石懸巔崖
轟轟凌雲掃壇竹
九靈少女列仙從
佩玉鳴鑿乘綵鳳
飛魂走魄歸瑤宮
紫簫吹斷荆王夢

雪霽梅月曲

羌玄圃兮玉英蹇冰輪兮太清倚縞袂兮誰子粲一笑
兮傾城倚橫吹兮寄哀思擘幽香兮補騷情

遊仙

人命如朝露壽非金石堅安得傳六翩飄飄凌紫烟夕
夢一道士羽衣何翩躚邀我與之去同上扶桑巔道遇
青童君授以東華篇讀之三百遍忽若骨已仙道士復
謂我玄訣未可傳賜我以瓊漿飲之享遐年明發寂無
覩孤鶴翔九天

詠懷

洪河相綿纏嘉宅良可卜蒼松蔭長蹊叢梅馥四屋過
亭白水飛流鳴漱寒玉遊目俯靈景抱杖委繁俗長吟
暢幽懷理琴展清曲豈不企凌厲而乃傷局促吉士抗
遐蹤幽幽聚靈族

步出城東門

步出城東門與子各執手遙望冢壘壘悲風發隴首長
松自青青枯根帶骨朽人生如朝露嘉命那可久世無

王子喬何訣以固壽感慨徒悲傷歡言且飲酒

山上有白雲

山上有白雲浮陰翳陽光亭亭颯繽紛出岫高飛翔飛
翔長在望遠匪千里隔莫以秋風來吹散無蹤跡

秋夜懷菊山沈莊可

涼風動金旻奄忽寒節至百卉俱萎垂梧桐亦飄墜明
月入我牖展轉不能寐顧影重傷心思君長下淚

歲晚懷愚齋趙叔愚壺山宋謙父

忽忽歲將暮烈烈北風涼霏霏雨素雪皎皎南枝芳慄
慄念良友乳乳在他鄉盈盈一水隔迢迢道路長悠悠
無信音戚戚重感傷翩翩化雙鶴去去與同翔

月洲李賈友山捧檄來滄訪我梅下示教禁體
物語詠梅佳句今歲梅開月洲仙去追和元韻
感此良友

庭前有奇樹幽艷發寒柯寂寂衆芳歇綿綿生意多孤
根依嶺表高節委巖阿清友今何在悠悠空逝波

和竹里蘇材叔見梅懷友韻

徘徊江路側何以慰相思
陽彩來寒樹貞姿倚暮籬
飄零懷遠道遼索負芳時
佇立幽吟苦餘懷將訴誰

西郊梅開懷吟軒周獻父

仲冬寒氣盛玄雲停故陰
嘉樹厲清節孤芳潔素心
幽熒歲落皎皎隔塵侵
折寄無來使山川迥且深

滕閣懷古

凭高獨展眺風葉亂鳴秋
鸞舞自空閣漁歌尚晚舟
卷

簾山歷歷倚檻水悠悠月出江城暮淒涼萬古愁

寄雲林楊少雲自衡之桂

問訊楊夫子經年客異鄉南浮湘水遠西望楚天長五
嶺梅花發孤城草色荒白雲遙滿目曷久住炎方

寄呈後村劉編修

衆作紛紛等噪蟬先生中律更鉤玄如開元可二三子
自晚唐來數百年人競寶藏南嶽藁商留金易後村編
儻令舐鼎隨雞犬凡骨從今或可仙

戴式之來訪惠石屏小集

詩翁香價滿江湖肯訪西郊隱者居瘦似杜陵常戴笠
狂如賈島少騎驢但存一路征行藁安用諸公介紹書
篇易百金寧不售全編遺我定交初

江居

獨作幽居計江邊屋數間水流天自在心遠地寬閑
月栽梅樹移雲疊石山白鷗盟欲結倚杖看潺湲

溪村

兀兀小橋西人家住繞溪雲山當戶入竹樹出簷齋風
急花初盡春深鶯亂啼稻畦新雨足穉子亦鉏犁

題杜少陵草堂圖

背郭好林塘誅茅作草堂因吟白鴉谷為卜碧雞坊籠
竹和烟淨江梅帶雪香四松經喪亂閱世幾風霜

遊玉笥山

玉笥凌空後玄都詔吏仙荒壇深覆草峭壁響流泉石
洞隨龍蟄金丹許鶴傳夜深搗藥鳥啼破翠微烟

入投龍洞

行入投龍洞青青見竹竿暮雲生道樹夜月滿仙壇枯
蘚沿崖古長松繞澗寒三生清淨福獨此愧黃冠

上慧力寺

今代空王宅前朝處士家牛車為象藏鹿苑發龍華松
密風生樹江空月在沙閣黎飯鐘後邀我試新茶

寄蒼山曾子實

東湖從此別嘉會邈無期望遠音書阻思君歲月馳春

雲山隔斷秋雨鴈歸遲欲見崆峒使梅花寄一枝

幽事

閑攜小斧刪梅樹自縛枯藤補菊籬燒栢子香讀周易
滴荷花露寫唐詩

遊仰山寺

施地開金刹神因結佛緣恠松盤懶徑古木護龍淵雲
裏春山亂禽啼夜月圓路遙歸不得好借上方眠

宮詞

內人倚遍玉樓東
曉色開雲臘
雪融羯鼓一聲花盡折
三郎自喚作天公

梅花

約臂金寒拓綺疏
搔頭玉重壓香酥
含章簷下新妝額
試啟菱花得似無

送表兄趙奏院赴南外知宗

御屏往往題名字
朝路彬彬藹薦書
天許留中監邸奏
日求補外得堂除
暫煩龍種司瑤籍
行立鴛班侍玉輿

丙枕或思前夜席庚郵寧肯後鋒車

王氏山居

聞道山居好林深遠俗情茶烟薰壁暗蘿月射窓明學稼修禾譜栽花識藥名無人覺幽隱為有讀書聲

送雲巢曾校勘赴召

高臥雲巢久雲生處士衣忽聞頒詔札催入侍經緯朝野名雖盛山林志莫違好歸清澗隱富貴有危機

水亭

闌檻玲瓏直又橫半臨池水著新亭擬招鷺宿栽添葦
怕礙魚行掠去萍五月藕花千樣錦四時山色一般青
有閑來此尋幽賞莫看人間淡墨屏

趙承遠雲扃

聞道幽居好棲雲結數椽庭深闕竹雨衣潤染茶烟嵐
氣生朝壁湍聲入夜絃半生飛動意未得痼林泉

江湖小集卷六十九

欽定四庫全書

江湖小集卷七十

宋 陳起 編

吳淵遺集

賦

江東道院賦

在太平府推官宅西北
抵子城公重修作賦

大江以南壤曰當塗嘗訂定謀聿求如初或曰楚雄繹
之故封尚存築壘或曰晉塗山之舊民來茲奠居以言
其形勢則襟江帶湖牛渚天門近對歷陽裕溪柵江遠

通濡須凡自昔之英雄豪傑多由此而戰爭馳驅上岸
擊賊洗足登艫殄此曹魏壯哉孫吳既克克狡照水而
見赤憤欲窺逆王夢日而來黃鬚英氣凜然如生遠猷
蔚其可書乃若景物則圖展畫舒長江天整濤瀾洶湧
青山白苧蒼翠紫紆高人達士之所栖隱而遁藏墨客
騷人之所吟詠而寫摹元暉卜宅弘景結廬袁臨汝長
嘯聲響於鸞鳳李謫仙既醉手弄乎蟾蜍清風高出乎
千古逸氣超軼乎萬夫至于乃疆乃理可舟可車西接

巴蜀東走勾吳北超中原南入番禺莫不由我之徑出
我之衝信其非僻陋之邦寂寞之墟矣然而事以時改
地因代殊其在分裂之朝往往重如馮扶至如混一之
世每每視同莒邾迨至本朝始為輿區爰自藝祖鏟平
煜雛初以卵壘入于版圖至于太宗混一偏隅西戎臣
伏北狄遠遁興隆典章際清朝之多暇會同文軌慶薄
海之無虞乃更太平興國之號用多治定成功之模乃
睠吾邦本遠帝京何驟遇于明時得躡陞為州城又即

年紀肇錫嘉名雨露之恩若偏于濡潤日月之光獨私于照臨山川草木增其燦爛旌幢旗幟倍以精明聖主既紆于皇眷高穹亦為之世情乃施天造乃飭地靈乃胚胎而醞釀乃培養而發生乃滋澆瘠或為膏沃之壤乃化刀劔亦為淳厚之民觀其綦布田疇支分岸塍平行夷曠曲直縱橫桑麻被野麩麥連雲時雨少愆有江湖以資其灌溉澇水或降有湖泊以泄其滔盈是以時少旱澇歲多豐登竒秧綠水喜霑足于夏種黃雞白酒

爭慶賀于秋成乃君其民混然大朴惟土物是愛故能
臧厥心惟本業是崇是以無末作盡力畝畝收功錢鎊
難貧以其勤苦易足以其儉約故有婦女平生未識于
綺羅亦有父老終身不入于城郭衣食足故多知廉恥
習俗厚故罕事鬪角盖皞皞乎有羲皇太古之風熙熙
然有唐虞擊壤之樂于是有厭承明之入直乞銅虎以
典州凡中朝之人士多出守而來侯皆得以逃其瘵曠
而遂其優游文如伯玉可抒六經閣之思詩如魯直堪

成一窩柳之謳爾乃夜已既而更殺日將晡而鼓振雖
兩衙其不廢縱數刻而已休蓋賦稅輸官而絡繹靡煩
程督訐訟造庭而希簡無可應酬故治事之時每短而
退食之暇常適雖謂之邦伯郡守實偶乎黃冠羽流當
其堦庭如水囹圄鞠草燕寢沈沈鈴閣杳杳雞鳴寂晝
鵲聲鬧曉何以異於道流之清淨而一塵之不到也避
堂舍蓋隱几對老收視斂聽回光反照虛室生白內境
火爝何以異于道流之煉養而臻其玄妙也華陽可中

清香可燒離騷可讀周易可校南董京生北牕夢覺何
以異於道流之蕭散而寄其高傲也著靈運履攜山翁
醪臨流賦詩登高舒嘯礮落碁聲泉響琴調何以異於
道流之放曠而縱其吟眺也夫吾儒與道流邪正不對
官府與生民休戚相關必也道吾之道而不道彼之道
樂民之樂而後樂己之樂使是邦不徒有太平之名而
乃有太平之實則是院不徒揭名道之扁而有體道之
誠不然則月三夜而旱告雷一聲而水浸穡事靡秋菜

色實繁人紀弗植天常既殘又不然則簿書如海文牒如山習方成於珥筆訟咸甘於褫鞶當是時也其容心逸而身閑乎故孟子曰文王樂以天下范文正公曰君子後天下而樂則以身為樂者其樂也鄙以民為樂也其樂也有限與民同樂者其樂也無忤所以貴乎道院者非樂慕道流為高致謂重夫清淨而吾以民為樂也雖然千里之內仰夫官奚容無所興除一命以上志於物則必有所惠濟夫苟貪無事之名至于不事其事吾

恐情或墜于閭閻姦必成於胥吏氣血滯則病疾生謳
吟息則愁歎起是為乖謬必傷乎和粹放縱難免于天
殃矣惟當以清淨為本以煩擾為忌政教因乎民本非
容心號令從乎俗未嘗作意則有無為之為不治之治
吾惟謹修于庭戶之間而彼將自得于湖山之外此則
老守之所當勲而益可以廣道院之義也

詩

早朝步葛元詰韻

萬井蒼涼欲曙天
禁鐘聲斷佩聲聯
雲浮玉輦霞裾降
風動金蓮寶炬然
四國龍飛清穆世
羣工虎拜太平年
吾王不倦宵衣念
國祚遙知永永傳

九日

百年王事謾勞形
客裏逢時跡類萍
無酒可添元亮興
任人浪笑阮宣醒
荆湖城壁連鉦鼓
河朔烽烟接堠亭
久擁旌旄愧無補
敢將衰朽歎飄零

登南城

江城一眺思悠悠平楚蒼然野水流衰草寒烟梅老墓
敗垣斜日謝公樓江山有恨英雄老天地無私草木秋
萬古興亡俱是夢丈夫何者為身謀

遊青山

謝朓宅
在焉

碧嶂千層鎮一州十年前記作斯遊因看紅杏行停轡
為濯清泉坐解裘怪石巉巖蹲虎豹老松偃蹇臥龍虬
轉高轉有無窮景杖履何妨絕頂頭

又

風流千載憶玄暉此日登臨不覺疲看取眼前都是句
如何身後不留詩須知小隱儻徉日正是高嗟寥泖時
可惜出山終不免空留翠岫與清漪

橫碧堂

十一年如一欠伸今朝又得快登臨半城楊柳春風滿
四野桑麻雨露深檻外翠峰重入眼樽前白髮遂驚心
感今懷昔憑闌處不覺崦嵫日已沈

用前韻

每來登眺便眉伸
高處蒼穹儼若臨
投老光陰隨日晚
思歸情緒與秋深
鷺飛沙際明人目
鴈滿江頭動客心
北望淮淝何處是
晚來烟霧正沈沈

官梅亭

疇昔花前屢舉觴
重來鬢髮已蒼蒼
未容籬菊成歸隱
且向官梅作醉鄉
每約松篁堅歲晚
肯隨桃李競春芳
東風二月無人惜
片片霏霏雪自香

霜筵亭

正到春歸惱客腸
茶縻架上發孤芳
劉伶嗜酒名為酒
薛女餐香肌亦香
人已今朝衰鬢髮
花猶昔日淡梳粧
十年陳迹渾如夢
徙倚闌干到夕陽

二

東皇為代是南薰
醞釀成花迥出塵
盡洗嬌紅春態度
獨呈雅素雪精神
牽衣弱蔓如留客
入枕清香更惱人
月下星前會醉插
肯容煩暑到冠巾

三

園丁編竹亦勤哉老蔓纖條費剪裁
杳杳翠雲深作洞霏霏香雪簇成堆
玉虬飛下盤千尺金爵攜將飲百杯
說與此花狼籍後園林杖履亦稀來

揮麈堂

老守重來何所為築成臺榭鑿成池
綠深夜雨龜魚遠紅壓春風鶯燕遲
民樂軒墀偏少訟官閒園圃自多詩
鳳團啜罷投衾枕夢覺花間日影移

又

戀宿懷安物我齊况兼兩世四持麾可憐園內落成日
却被官中捉去時李郭詩篇懷舊迹歐梅歌舞悵新知
多應日後清宵夢頻到姑溪溪水湄

送杜尚書赴行在

龍德剛中道學優洛中夫子爾同流暫辭天府安邊閫
又屬輶車返帝州萬里長城唐李勣百年勲業漢留侯
明朝回首秋江上泰華巖巖天際頭

冬雨

坐來襟霰灑隆冬痛飲那禁感發風却憶西樞承旨日
冒寒猶立大明宮

高氏小景

地白天寒凍裂裘何人乘艇下中流披圖孟浪不相識
疑是當年王子猷

峨眉山

在采石見寰宇志

一帶天分南北限兩眉烟鎖古今愁

闕

詩餘

念奴嬌

牛渚

我來牛渚聊登眺。客裏襟懷如豁。誰著危亭當此處。占斷古今愁絕。江勢鯨奔。山形虎踞。天險非人設。可憐一炬空鎖。千尋寒鐵。追念照水燃犀。男兒當似此英雄。豪傑歲月匆匆。留不住。鬢已星星。堪鑷雲黯。江天烟昏。淮地正是斷魂時節。欄干搥碎。酒狂忠憤俱發。

水調歌頭

杏

太白已仙去詩骨此山藏胸中錦繡如屋都乞與東皇
碎剪杏花千樹濃抹胭脂萬點妖豔斷人腸曉露沐春
色晴日漲風光孤村路逢休暇共徜徉酒旗斜處一
簇幾紅粧暫息江頭烽火無奈鬢邊霜雪聊復放疎狂
倚俟玉壺渴未肯寶鞭揚

沁園春

壽弟相國

喜我新歸逢戎初度關情更深正畫掩柴扉尋隱遯舒
槐府戎正經綸白石清泉紫樞黃閣弟為宰相兄作閑
人南園借我登臨都不怕近前丞相嗔但曳履扶筇
堪憐獨步攜壺載酒每歎孤斟七袞開顏六旬屈指風
雨對牀頻上心慙懃祝道我何時回首及早抽身

此辭
前段

句脫
字誤

江湖小集卷七十